



服部文庫  
イ17  
191  
2





117  
191  
2

禮經釋例卷二目錄

通例下

凡授受之禮同面者謂之竝授受

凡授受之禮相鄉者謂之訝授受

凡授受之禮敵者于楹間不敵者不于楹間

凡相禮者之授受皆訝授受

凡卑者于尊者皆奠而不授若尊者辭乃授

凡佐禮者在主人曰擯在客曰介

凡賓主人禮盛者專階不盛者不專階

凡戒賓宿賓宿者必先戒禮殺者則不宿





凡賓升席自西方主人升席自北方

凡禮盛者必先盥

凡降洗降盥皆壹揖壹讓升

凡賓主人敵者降則皆降

凡一辭而許曰禮辭再辭而許曰固辭三辭不許曰終辭

凡庭洗設于阼階東南南北以堂深天子諸侯當東雷卿大夫士當東榮水在洗東

按自此以下八例皆行禮之大節故不入飲食及器服之例而入通例

凡內洗設于北堂上南北直室東隅東西直房戶與隅間

凡設尊賓主人敵者于房戶之間君臣則于東楹之西竝兩壺有元酒有禁

凡醴尊皆設于房中側尊無元酒

凡堂上之篚在尊南東肆

凡堂下之篚在洗西南肆

凡陳鼎大夫士門外北面北上諸侯門外南面西上反吉則西面

凡設席南鄉北鄉于神則西上于人則東上東鄉西鄉



于神則南上于人則北上  
共二十一例

禮經釋例卷二



通例下

歛凌廷堪次仲學

凡授受之禮同面者謂之竝授受

廷堪案士昏禮納采授鴈于楹間南面注竝授也疏云以經云南面不辨賓主故知俱南面竝授也聘禮授幣宰執書告備具於君授使者使者受書授上介注其受授皆北面又使者受命宰執圭屈纁自公左授使者使者受圭同面垂纁以受命注同面者宰就使者北面竝受之又云既述命同面授上介上介與賓同受



禮記釋例 卷二  
君命故同面並受又還玉賓升自西階自左南面受與相禮授受不同圭注自左南面右大夫且並受也必並受者若鄉君前耳又使者反命公南鄉卿進使者使者執圭垂纁北面上介執璋屈纁立於其左反命畢宰自公左受玉受上介璋亦如之注亦於使者之東同面並受也不右使者由便也皆同面而授故曰同面者謂之並授受也又士昏禮納采授鴈聘禮饋歸饗餼使者又賓面卿受束帛經皆云于楹間南面而注以納采為並受饋歸饗餼使者面卿為訝受疑不能明豈以士卑故與使者不嫌歟敖氏繼公以納采為訝受公食

大夫禮宰夫自東房授醯醬敖氏曰此亦並受也下放此蓋以訝受為賓主行禮之事並受為相禮之事故聘禮既述命同面授上介敖氏曰此授受皆同面別於聘時賓主之儀也其不見者以此求之敖氏蓋謂聘時廟門外賈人上介及賓之授受非廟中賓主之儀是相禮者之事皆並受不知非經意也受命時君尊不與其臣行禮故使宰授書授圭又皆北面於君故並受聘時廟門外賓立接西塾東面上介北面受圭進西面授賓據注賓東面上介西面明是訝受不得以受命時並受例之也詳見相禮之授受例中又凡尊者



不與卑者行禮不獨聘之受命也如舅姑醴婦使贊者授醴君燕其臣使宰夫為主人皆是至於聘賓反命亦於北面於君前宰與賓及上介皆同面授受與前受命之例正同也又有司徹尸酢三獻尸在其右以授之敖氏曰尸在其右並受也此非相禮之事敖氏以為並受亦自亂其例矣又士相見禮雖受贊於庭亦是相敵者之授受依士昏禮納采之注則是並授受依聘禮饋歸饗餼使者及賓面卿之注則是訝授受

又案聘禮禮賓宰夫實解以醴加柶於解面枋注不

面撤不訝受也疏云公西面向賓宰夫自東箱來在公旁側並授與公是以下文公側受醴不訝受故不面撤也賓覲士受馬者自前還牽者後適其右受注自由也適牽者之右而受之也此亦並受者不自前自由便也考宰夫授醴賓覲經皆無明文而注以為左由便也考宰夫授醴賓覲經皆無明文而注以為並受者授醴則以經之面枋知之賓覲則以經之適其右知之或疑宰夫面枋安知非訝授公而公則並授賓乎愚謂宰夫授醴於賓前若訝受則嫌於背賓故注以為並受不訝受也士冠禮賓醴冠者士昏禮主人醴使者贊者酌醴皆加柶面葉

注葉柶大端古文葉為擣即撤



也 訝受不竝受者冠者及使者皆卑故也

又案聘禮使者受圭同面垂纁以受命注凡授受者授由其右受由其左疏云據鄉飲酒鄉射燕禮獻酢酬皆授由其右受由其左故云凡以廣之詳疏意蓋以獻酢酬之授受者竝受也考鄉飲酒禮主人西南面獻介介進北面受爵則是訝受非竝受明矣曲禮曰鄉與客竝然後受鄭注於堂上則俱南面禮敵者竝授考禮經無竝受之文注云竝受蓋據曲禮也以禮經證之則並受亦不皆敵者也

凡授受之禮相鄉者謂之訝授受

廷堪案聘禮郊勞勞者奉幣入東面致命賓北面聽命還少退再拜稽首受幣疏云此行禮尊卑訝受法歸饗餼時堂上北面受幣此在廷亦當北面訝受幣勞者南面可知也又禮賓授几公東南鄉外拂几三卒振袂中攝之進西鄉擯者告賓進訝受几於筵前東南俟注今文時主君西鄉賓東面故經云訝受又訝為梧禮賓用束帛賓受幣當東楹北面注亦訝受而北面者禮主於己已臣也疏云前聘享時賓東面主君西面訝授受但以奉君命故賓不北面此以主君禮己已臣也故北面受異於聘享時也據此則上文聘時



公側襲受玉于中堂與東楹之間享時公再拜授幣  
謂束帛皆訝受也又賓覲振幣進授當東楹北面又  
加璧介覲北面受幣此受幣在廷又歸饗餼及賓問卿皆受幣  
堂中西北面以郊勞疏考之皆訝受也又賓面卿受  
幣于楹間南面注賓亦振幣進北面授公食大夫禮  
公以束帛侑賓賓受幣當東楹北面注主國君南面  
授之亦皆訝受士昏禮醴賓主人受醴面枋筵前西  
北面賓拜受醴又贊醴婦贊者酌醴加枋面枋出房  
席前北面婦東面拜受云面枋者皆是訝受以便以  
枋受之也聘禮禮賓宰夫面枋注謂竝受公既竝受

宰夫之醴則授賓仍是訝授面枋可知也若宰授公  
是訝授則當如士冠士昏贊者面葉矣皆相鄉而受  
故謂之訝授受也又鄉飲酒禮及鄉射禮主人西北  
獻賓賓進受爵賓東南面酢主人主人進受爵以及  
燕禮大射獻賓酢主人之屬士虞禮主人初獻亞獻  
如初特牲少牢主人初獻主婦亞獻賓三獻之屬有  
司徹主人獻尸侑受尸酢主婦獻尸侑致爵於主人  
受尸酢賓三獻之屬皆有受爵之儀以鄉飲酒獻介  
之例推之蓋皆訝受也  
又案授受之例統觀禮經全文當云行禮於尊者之



前則同面受即竝授受也竝受二字不見於經不於尊者之前則訝相受如聘禮授幣受圭反命其禮行於君前皆同面受也還玉不在君前亦同面受者注云必竝受者若鄉君前耳此外則皆訝授受以此求之則聘禮禮賓宰夫授禮面枋賓覲士受馬者自前還牽者後適其右受雖相禮者之授受而行於尊者之前故亦竝受如此則經例固條理分明一以貫之矣惟士昏禮納采授鴈于楹間南面注以為竝受此非行於尊者之前而亦竝受則與此例不合然聘禮饋歸饗餼使者賓面卿經文皆云受幣于楹間南面與士昏禮納采

同而注又以為授者北面受者南面非竝受經同注異竊疑士昏禮之注非也蓋鄭賈之說以訝受為尊卑相受法竝受為敵者相受法敖氏之說則以訝受為行禮之事竝受為相禮之事皆與經不合今仍依鄭氏注釋之而附鄙見於此俟深於禮者擇焉

凡授受之禮敵者于楹間不敵者不于楹間

廷堪案聘禮歸饗餼饋使者受幣于楹間南面前受幣是

使者奉主君命故受於堂中西又賓面卿受幣于楹間南面前問卿是奉其

君之命故卿受於堂中西此聘賓是卿歸饗餼使者是上大夫所面者亦主國之卿皆相敵者是相敵者授受于楹間



也士昏禮納采使者授于楹間南面也授鴈注授於楹間明爲合好其節同也疏云凡賓主敵者授於楹間不敵者不於楹間今使者不敵而於楹間故云明爲好合也納采使者是夫家羣吏故疏云不敵因好合之故授於楹間尊其使如相敵者之儀也若賓主不敵者聘禮公側襲受玉于中堂與東楹之間注中堂南北之中也入堂深尊賓事也東楹之間亦以君行一臣行二又禮賓公用束帛賓升受幣當東楹北面又私覲賓振幣進授當東楹北面公食大夫禮公受宰夫束帛以侑賓升受幣當東楹北面注當東楹者

欲得君行一臣行二也主是主國之君賓是異國之臣皆主尊賓卑故授受於中堂之東主在東故賓趨東就之也聘禮歸聘賓饗餼之禮受幣堂中西北面注趨主君命也堂中西中央之西又聘賓問卿受幣堂中西北面注於堂中央之西受幣趨聘君之命歸饗餼使者爲賓使者奉主君之命故尊問卿聘賓爲賓聘賓奉聘君之命亦尊皆賓尊主卑故授受於堂中西賓在西故主趨西就之也若聘賓饋歸饗餼使者反面卿皆自行禮卿與卿相敵故授受於楹間也此制禮之精義也李氏如圭曰禮賓賓覲受幣皆當



東楹臣禮也春秋傳鄭伯如晉拜成授玉於東楹之東士貞伯以為視流行速不安其位凡敵者授受當於兩楹間也又鄉飲酒禮介酢主人授主人爵於兩楹之間此飲酒之禮與受摯之禮不同也蓋授玉授幣此授受之盛禮也授几授醴次之授祭又次之若飲酒之授爵士昏記之授綬則其殺焉者矣

又案授受之禮盛者受於堂殺者受於庭士相見禮賓奉贄入門左主人再拜受賓再拜送注不受贄於堂下人君也聘禮上介覲公再拜介振幣自皮西進北面授幣注拜中庭也不受於堂介賤也又士介覲

宰夫受幣於中庭以東注使宰夫受於士士介幣輕也受之於公左賓幣公側授宰此賓覲之幣上介幣宰受於公左士介幣宰夫受於士敬之差又衆介面卿老受擯者幣於中庭聘禮記賓私獻擯者授宰夫於中庭然則受於堂者有楹間不楹間之殊受於庭者有親受不親受之殊矣又鄉飲酒旅酬受酬者自介右注由介東也尊介使不失故位疏云凡授受之法授由其右受由其左此受酬者應自介左而自右者尊介也此亦授受之例也

凡相禮者之授受皆訝授受



廷堪案聘禮禮賓賓執左馬以出上介受賓幣從者  
訝受馬注從者士介又上介觀請受介禮辭聽命皆  
進訝受其幣聘禮記主人之庭實則主人遂以出賓  
之士訝受之注此謂餘三馬也左馬賓執以出矣禮  
庭實乘馬公食大夫禮公以束帛侑賓上介受賓幣  
故注云然從者訝受皮注今文又聘禮將聘時士介不襲執圭  
曰悟受屈纁授賓注上介北面受圭進西面授賓是亦訝受  
敖氏繼公謂授賓東面於其右者非也既夕禮賓賻  
若無器則悟受之注謂對相授不委地此相禮者之  
授受皆訝授受也此皆以經文為據者士冠禮賓禮

冠者贊者側酌醴加柶覆之面葉贊者面葉以枋授  
賓也士昏禮女父醴使者同則亦訝受然則敖氏以  
竝受為相禮之事者顯與經違矣又士冠禮執冠者  
升一等東面授賓大射儀君與賓耦射大射正授弓  
小臣師授矢聘禮使者受命賈人西面坐啓櫝取圭  
垂纁不起而授宰又云上介受圭屈纁出授賈人眾  
介不從又將聘賈人東面坐啓櫝取圭垂纁不起而  
授上介又禮賓公升側受几于序端宰夫內拂几三  
奉兩端以進又士介覲宰夫受幣于中庭以東聘禮  
記賓私獻擯者授宰夫于中庭公食大夫禮宰夫自



東房授醯醬授太羹滂

以上正饌

又宰夫授公飯梁

以上加饌

又贊授賓祭特牲少牢有司徹祝及宗婦主婦贊者亦有授受之事皆相禮之授受唯行于尊者之前為竝受此外蓋皆訝受經不云者略之也

又案士昏禮禮賓主人拂几授校拜送賓以几辟北面設於坐左之覲禮儻郊勞使者侯氏先升授几有司徹主人西面左手執几縮之以右袂推拂几三二手橫執几進授尸于筵前尸進二手受于手間主人退尸還几縮之右手執外廉北面奠于筵上左之南縮不坐以聘禮禮賓授几推之皆訝受也又士經云

主人降受宰几又云宰授几主人受二手橫執几揖口此亦相禮者之授受授几之儀有司徹最詳士冠禮拂几授校注以為几足敖氏繼公以有司徹推之謂校為左廉其或然歟又士昏禮疏云凡授几之法卑者以兩手執几兩端尊者則以兩手於几間執之授設皆然蓋兼行禮授受與相禮授受言之

凡卑者於尊者皆奠而不授若尊者辭乃授

廷堪案士冠禮奠摯見於君士昏禮親迎賓升北面奠鴈再拜稽首士相見禮士見於大夫若嘗為臣者奠摯再拜主人答壹拜注奠摯尊卑異不親授也又



始見於君士大夫則奠摯再拜稽首此男子之禮又士昏禮婦見舅執筭棗栗自門入升自西階進拜奠于席注奠之者舅尊不敢授也又見姑受筭服脩升進北面拜奠于席此女子之禮是卑者於尊者皆奠而不授也又聘禮聘後賓即館卿大夫勞賓賓不見大夫奠鴈再拜上介受勞上介亦如之此賓因公事未行辭之故奠摯也又士昏禮不親迎壻見入門東面奠摯再拜出注奠摯者壻有子道不敢授也此卑者先奠而不授也又云擯者以摯出請受注欲使以賓客禮見又云壻禮辭許受摯入主人再拜受壻再拜送出此

女父辭壻乃授也聘禮賓覲入門右北面奠幣再拜稽首此聘賓先以臣禮見奠而不授也又云擯者辭賓出擯者以幣出又云擯者請受賓禮辭聽命又云振幣進授此主君辭聘賓乃授也又上介覲皆入門右東上奠幣皆再拜稽首此上介先以臣禮見奠而不授也又云擯者辭介逆出擯者以幣出又云擯者請受介禮辭聽命又云介振幣自皮西進北面授幣此主君辭上介乃授也又上介面卿入門右奠幣再拜此上介先奠而不授也又云大夫辭擯者反幣又云介奉幣入大夫揖讓如初介升大夫再拜受此主國之卿辭



上介乃授也觀禮侯氏入門右坐奠圭再拜稽首注  
卑者見尊奠摯而不授此侯氏觀天子先奠而不授  
也又云擯者謁注謁猶告也上擯告以天子前辭欲  
親受之如賓客也又云侯氏坐取圭升致命王受之  
玉此天子辭侯氏乃授也又四享奠幣束帛加璧再拜稽  
首此侯氏享天子先奠而不授也又云擯者曰子一  
人將受之侯氏升致命王撫玉侯氏降自西階東面  
授宰幣此天子辭侯氏乃授也天子不親受使宰受  
之殺於覲時也皆卑者先奠而不授尊者辭乃授蓋  
以客禮待之也又聘禮士介覲入門右奠幣再拜稽

首擯者辭介逆出擯者執上幣以出禮請受賓固辭

注固衍字當如面大夫也又衆介面卿入門右奠幣皆再拜大夫

辭介逆出擯者執上幣出禮請受賓辭又聘禮記賓

若私獻東面坐奠獻再拜稽首擯者東面坐取獻舉

以入告出禮請受賓固辭注固亦衍字此皆尊者雖辭終

不敢授禮又殺也賓私獻奠而不授注以為蒞受者則以擯者東面知之

又案授受之例卑者先奠而不授猶之入門例先入

門右拜例先堂下再拜稽首也至尊者辭之乃授猶

之入門例尊者辭之乃入門左拜例尊者辭之乃升

成拜也其實奠而不授為卑者之正禮猶之入門右



為卑者入門之正禮堂下再拜稽首為卑者拜之正禮也其繁縟之中有條而不紊非比其例而觀之則聖人親親之殺尊賢之等何由而見乎飲酒之禮獻酢皆授酬則奠而不授亦此例也

凡佐禮者在主人曰擯在客曰介

廷堪案士冠禮擯者請期注擯者有司佐禮者在主人曰擯在客曰介所謂擯介者凡禮皆有之亦禮之通例也士冠禮又云擯者元端負東塾又迎賓擯者告士昏禮擯者出請事問名禮實同士昏記賓至擯者請又不親迎婿見擯者以摯出請受燕禮射人納賓注

射人為擯者也今文曰擯者大射儀大射正擯擯者請賓又擯者命賓擯者反命擯者納賓公食大夫禮賓入大夫納賓注大夫謂上擯也又拜至擯者辭又賓三飯擯者退負東塾而立又公以束帛侑賓擯者進相幣公食大夫記卿擯由下此嘉禮之擯也士相見禮士見於大夫若嘗為臣者賓出使擯者還其摯於門外又賓對擯者對又始見於君若他邦之人則使擯者還其摯聘禮卿為上擯大夫為次擯士為紹擯又賓問卿下大夫擯聘禮記賓若私獻擯者入告覲禮嗇夫承命注嗇夫蓋司空之屬也為末擯又擯



禮記卷二  
者謁又擯者延之曰升又享擯者曰予一人將受之  
又禮畢擯者謁諸天子又諸侯覲於天子四傳擯此  
賓禮之擯也既夕禮公贈擯者出請入告又賓贈者  
將命擯者出請入告又賓奉幣擯者先入又贈畢擯  
者出請又贈者將命擯者出請此凶禮之擯也有司  
徹主人出迎尸宗人擯注賓客尸而迎之主人益尊  
擯贊此吉禮之擯也皆在主人曰擯也士冠禮冠畢  
乃禮賓以壹獻之禮贊冠者為介注介賓之輔飲酒  
之禮賢者為賓其次為介疏云此禮賓與饗禮同鄉  
飲酒禮主人就先生而謀賓介注賢者為賓其次為

介聘禮記大夫來使無罪饗之其介為介注饗賓有  
介者尊賓行敵禮也

據此則饗禮亦有介

此嘉禮之介也聘禮

受命遂行上介及眾介俟於使者之門外交勞上  
介出請入告又聘介皆入門左又上介覲士介覲又  
歸饗餼上介請事又賓問卿上介特面眾介面又還  
玉上介出請又公館賓賓辟上介聽命注聽命於廟  
門中西面如相拜者然也覲禮上介皆奉其君之旂  
置於宮此賓禮之介也有司徹乃議侑于賓以異姓  
宗人戒侑賓尸之禮尸如賓侑如介此吉禮之介也  
皆在客曰介也至於聘禮郊勞歸饗餼還玉之上介



出請歸饗餼即聘問禮之擯者出請也公館賓之上

介聽命即覲面及私獻禮之擯者立於門中私獻作闕外

以相拜也此時皆賓為主人故上介所行皆擯者之

禮矣

又案士冠禮疏云聘禮及大行人皆以在主人曰擯

在客稱介亦曰相司儀每門止一相是也士相見禮

請還贄於將命者注將猶傳也傳命謂擯相也疏云

出接賓曰擯入詔禮曰相一也故聘禮與冠義皆云

每門止一相是謂擯介為相也考聘禮冠義皆無每

門止一相之文唯周官司儀有之不知疏說何所本

又鄉飲酒鄉射主人迎賓皆云主人一相迎於門外

注相主人之吏鄉射注作主人家臣擯贊傳命者皆指擯者曰

相唯司儀鄭注相謂主君擯者及賓之介故疏兼擯

介而言也

凡賓主人禮盛者專階不盛者不專階

廷堪案士冠禮孤子冠凡拜北面于阼階上賓亦北

面于西階上答拜士昏禮納采賓升西階當阿東面

致命主人阼階上北面再拜禮畢醴賓揖讓如初如授

焉升主人北面再拜亦於阼階上賓西階上北面答拜鄉

飲酒鄉射賓至主人升賓升主人阼階上當楣北面



再拜賓西階上當楣北面答拜鄉射作答再拜主人獻賓拜  
 洗受爵送爵告旨卒爵賓酢主人拜洗受爵送爵卒  
 爵崇酒主人酬賓先卒觶及受觶送觶皆主人阼階  
 上拜賓西階上拜聘禮公升二等賓升西楹西東面  
 歸饗餼及問卿皆賓主專階有司徹迎尸迎侑主人  
 先升自阼階尸侑升自西階西楹西北面東上主人  
 東楹東北面拜至尸答拜主人又拜侑侑答拜主人  
 獻尸送几受几拜洗受爵送爵告旨卒爵主人受尸  
 酢拜洗受爵卒爵崇酒主人酬尸先卒觶受觶皆主  
 人于東楹東拜尸于西楹西拜東楹東卽阼階上也

西楹西卽西階上也公食大夫拜至賓雖降階拜辭  
 之始升成拜然亦各拜于其階是禮盛者則專階也  
 鄉飲酒主人獻介受爵送爵卒爵介酢主人介不自酌但以  
 虛爵授主人實爵卒爵崇酒皆介于西階上拜主人于介  
 主人虛爵授主人實爵卒爵崇酒皆介于西階上拜主人于介  
 右拜同拜于西階上鄉射禮主人獻大夫卽遵者受爵送爵卒  
 爵大夫酢主人實爵大夫亦授主人卒爵崇酒亦大  
 夫于西階上拜主人于大夫右拜鄉飲酒鄉射主人  
 獻衆賓于西階上衆賓之長升拜受者三人主人拜  
 送注拜送爵於衆賓右是亦同在西階上也燕禮大  
 射賓主人皆升自西階主人賓右至再拜賓答再拜



主人獻賓拜洗送爵受爵告旨卒爵賓酢主人拜洗  
受爵送爵卒爵主人不崇酒辟君也主人酬賓先卒爵受爵送  
爵皆賓于西階上拜主人于賓右拜燕禮大射公席  
于阼階上不與賓行獻酢之禮別使宰夫爲主人故  
不敢專階而與賓同行禮于西階上也若主人獻公  
則降自西階于阼階下拜獻卿獻大夫獻士亦同于  
西階上拜有司徹主人獻侑侑于西楹西拜主人于  
侑右拜是禮不盛者則不專階也又特牲饋食禮主  
人獻賓受爵送爵卒爵及酌酢賓皆于西階上拜主  
人于賓右拜祭畢飲酒殺于飲酒正禮故不專階也

至于有司徹獻長賓略同鄉飲酒獻衆賓之儀故亦  
同在西階上也聘禮還玉大夫升自西階鉤楹賓自  
碑內聽命升自西階自左南面受圭聘賓與卿皆在  
西階行禮又皆不拜異於賓主正禮也  
凡戒賓宿賓宿者必先戒禮殺者則不宿

廷堪案士冠禮主人戒賓注戒警也告也又宿賓注  
宿進也宿者必先戒戒不必宿其不宿爲衆賓或悉  
來或否鄉飲酒禮主人戒賓賓拜辱主人答拜乃請  
賓陳器之後主人速賓賓拜辱主人答拜注速召也  
鄉射禮主人戒賓賓出迎再拜主人答再拜乃請注



戒猶警也又主人朝服乃速賓注速召也士冠鄉飲酒鄉射皆先戒賓而後宿賓所謂宿者必先戒也速即宿也特牲饋食禮宿尸注凡宿或作速此其證也惟士冠速賓於前日鄉飲酒鄉射速賓於當日為小異耳疏謂鄉飲酒鄉射皆有戒無宿非也若燕禮小臣戒與者大射君有命戒射宰戒百官有事於射者射人戒諸公卿大夫射司士戒士射與贊者前射三日宰夫戒宰及司馬公食大夫禮使大夫戒方是有戒無宿也大射射人宿視滌疏以為非戒宿之宿特牲饋食禮宿尸宿賓之前皆無戒疏以為特牲文

不具其實亦有戒疏說皆是也少牢饋食禮筮日之

後乃官戒

注官戒戒諸官也

又云宿

注宿讀為肅肅進也

前宿一日宿

戒尸此戒尸也筮尸之後乃遂宿尸此宿尸也注云大夫尊儀益多筮日既戒諸官以齋戒矣至祭前一日又戒以進之使知祭日當來疏云其大夫宿戒兩有士有宿而無戒是儀略故云大夫儀多也則又謂特牲有宿無戒與士冠疏文互異矣

凡賓升席自西方主人升席自北方

廷堪案鄉飲酒禮鄉射禮主人獻賓賓皆升席自西方鄉射禮主人獻大夫

大夫即遵也

大夫升席注大夫升



席由東方是賓升席自西方遵升席自東方也鄉飲酒記主人介凡升席自北方降自南方鄉飲酒鄉射賓酢主人主人皆升席自北方將立司正安賓及徹俎主人皆降席自南方鄉飲不云自南方文不具也鄉飲酒主人獻介介升席自北方旅酬主人酬介介降席自南方經悉與記合燕禮大射但有升筵降筵之文不云升降自何所者蓋以禮已具於鄉飲鄉射故也有司徹主人獻尸尸升筵自西方主人獻侑侑升筵自北方與鄉飲酒同蓋祭畢儻尸筵尸于戶西南面如鄉飲酒之賓筵侑于西序東面如鄉飲酒之介侑以輔尸

如介以輔賓也故主人升筵自北方亦與鄉飲酒同也有司徹主人席于東序西面侑主人降筵皆自北方與鄉飲酒

異者少變於飲酒正禮也據此益見升由下降由上非通例鄉飲酒

鄉射主人獻賓賓降席注皆云降席席西也是賓升降皆自西方然則遵升降皆自東方歟

又案鄉飲酒禮賓升席自西方注升由下也此據鄉

射經文賓席東上而言鄉飲酒記主人介升席自北方降自南方注席南上升由下降由上由便此據曲

禮而言皆因文釋之非謂禮之通例如此也故鄉射禮賓升席自西方注云賓升降由下也賈疏不得注



意徵引雖繁而膠葛不明今但據見于經文及注者  
取以爲例經注無文者不敢爲之說也  
凡禮盛者必先盥

廷堪案士冠禮初加賓盥卒壹揖壹讓升再加賓盥  
如初士昏禮婦至舉者盥又舅姑入于室婦盥饋此  
冠昏之盥也鄉飲酒鄉射禮主人獻賓盥洗注已盥  
乃洗爵致潔敬也又云卒洗升復降盥賓酢主人同  
又介酢主人降洗卒洗主人盥注盥者當爲介酌  
主人自飲而燕禮大射主人獻賓盥洗卒洗升復降  
盥者尊介也盥賓酢主人同又主人獻公盥洗升  
未拜故此燕飲

之盥也獻賓拜洗後復降盥者爲拜時手坊汙禮尤  
盛也公食大夫禮賓至載俎大夫長盥洗東南西面  
北上序進盥退者與進者交于前卒盥序進又設正  
饌公降盥賓降公辭卒盥此食禮之盥也士喪禮飯  
舍小歛奠大歛奠朝夕奠經皆云盥凶事無洗但設  
盆盥而已此喪禮之盥也士虞禮陰厭祝盥升又佐  
食及執事盥又迎尸淳尸盥宗人授巾注淳沃也特  
牲饋食禮陰厭主婦盥于房中又云宗人遣佐食及  
執事盥出主人降及賓盥出又祝迎尸尸入門左北  
面盥宗人授巾又嗣舉奠盥入又養宗人遣舉奠子嗣



也又長兄弟盥立于西階下少牢饋食禮將祭士盥舉鼎又云宗人遣賓就主人皆盥于洗又陰厭祝盥于洗升自西階主人盥升自阼階又迎尸宗人奉槃東面于庭南一宗人奉匱水西面于槃東一宗人奉篋巾南面于槃北乃沃尸盥于槃上卒盥坐奠篋取巾興振之三以授尸坐取篋典以受尸巾有司徹主人獻尸降洗卒洗降盥卒盥又主人受尸酢尸卒洗降盥卒盥又養上佐食盥升此祭禮之盥也又士虞陳器匱水錯于槃中南流在西階之南篋巾在其東特牲陳設尸盥匱水實于槃中篋巾在門內之右少

牢陳設小祝設槃匱與篋巾于西階東士虞記淳尸盥執槃西面執匱東面執巾在其北東面宗人授巾南面皆言尸盥也尸不盥于洗而盥于槃匱者尊尸也考士冠禮醴冠者贊者洗于房中注盥而洗爵疏云凡洗爵者必先盥盥有不洗爵者此經直云洗明盥手乃洗爵故鄭云盥而洗爵則經云洗爵者皆盥而後洗不云盥者文不具也

凡降洗降盥皆壹揖壹讓升

廷堪案鄉飲酒鄉射主人獻賓降洗賓降主人辭降主人洗賓辭洗主人卒洗壹揖壹讓以賓升又降盥



賓降主人辭降賓不辭盥卒盥亦壹揖壹讓升賓酢  
 主人卒洗揖讓如初升降盥如主人之禮主人酬賓  
 降賓降主人辭降賓不辭洗卒洗揖讓升主人卒解  
 訖又降洗賓辭降如獻禮升鄉飲酒獻介鄉射獻尊  
 皆揖讓升降洗如賓禮升不盥不拜洗特牲主人獻  
 賓降阼階西面拜賓如初洗賓辭洗卒洗揖讓升是  
 皆壹揖壹讓也燕禮大射主人獻賓賓酢主人降洗  
 降盥皆賓揖先升主人乃升主人酬賓降洗卒洗亦  
 揖升不讓鄉飲酒鄉射是賓主人正禮故揖讓俱升  
 燕禮大射則宰夫為主人故賓揖不讓先升也公食

大夫卒盥壹揖壹讓公升賓升此賓是異國之臣故  
 公先升也有司徹主人降洗降盥尸侑亦降卒洗卒  
 盥經但云揖不云讓禮殺也鄉飲酒鄉射主人獻眾  
 賓卒洗升有司徹主人受尸酢卒洗卒盥升主人獻  
 長賓卒洗升皆不揖不讓禮又殺也燕禮大射獻卿  
 獻大夫獻士升不揖讓者盛禮不在已也至于鄉飲  
 酒獻賓畢賓降立于階西當序東面獻介畢介降立  
 于賓南獻眾賓眾賓之長升受者三人畢降復賓南  
 東面位鄉射同但無介至一人舉觶時始揖讓升蓋亦壹揖  
 壹讓也



凡賓主相敵者降則皆降

廷堪案鄉飲酒禮主人獻賓取爵于筐降洗賓降注

從主人也卒洗升復降盥注復盥為手垢汗賓亦降賓酢主

人賓降洗主人降卒洗升復降盥如主人禮主人酬

賓降洗賓降升主人卒觶酬酒主人先飲復降洗賓降如獻

禮主人獻介降洗介降介酢主人降洗主人復降階

降獻介主人與介同在西階上降時方復降階辭如初鄉射同唯無介燕

禮主人此主人以幸夫為之獻賓降洗賓降卒洗升復降盥賓

降賓酢主人賓以虛爵降主人降卒洗升復降盥主

人降主人酬賓主人降洗賓降大射同有司徹主人

獻尸主人降洗尸侑降卒洗升復降盥尸侑降主人

受尸酢尸降洗主人降自降階卒洗升復降盥主人

降主人酬尸降洗爵尸侑降卒洗尸升侑不升主人

先卒觶降洗尸降聘禮介面卿介降拜大夫降辭此

皆賓主相敵者降則皆降也有司徹祭畢賓尸之禮

尸如賓侑如介則尸侑皆賓不似正祭時尸尊故亦

與主人俱降如鄉飲酒也鄉飲酒鄉射主人獻眾賓

不備升降之禮者眾賓卑也燕禮大射主人獻公公

不降者公尊也公食大夫禮公降盥賓降公辭賓主

不敵亦降者主君尊賓也主人獻卿獻大夫皆云主

禮經釋例



禮記釋例 卷二  
人洗升不云降者蓋卿大夫之位本在堂下主人酬  
賓之後亦降復位也獻士獻庶子不備升降之禮者  
卑也有司徹主婦獻尸洗於房中不降者婦人之禮  
變於男子也聘禮歸饗餼聘賓儻使者賓降堂受老  
束錦將以授大夫者止注止不降使之餘尊疏云  
凡賓主體敵之法主人降賓亦降今賓降使者不降  
者使之餘尊雖合降而不降注蓋謂使者奉主君之  
命來有主君之餘尊故不降疏但覆述注文而已未  
能發明餘尊之義也  
凡一辭而許曰禮辭再辭而許曰固辭三辭不許曰終

辭

廷堪案士冠禮主人戒賓賓禮辭許注禮辭一辭而  
許也再辭而許曰固辭三辭曰終辭不許也又冠禮  
畢請醴賓士昏禮納采問名之禮既畢請醴賓賓皆  
禮辭鄉飲酒請賓鄉射禮戒賓燕禮大射儀命賓鄉  
飲酒鄉射安賓賓皆禮辭鄉飲酒鄉射作相為司正  
司正皆禮辭聘禮主國之君使卿郊勞聘賓禮辭郊  
勞畢聘賓將儻勞者勞者禮辭聘享正禮已畢未私  
覲之前主國之君使儻者請禮賓及私覲聘賓先以  
臣禮見儻者辭出請以客禮受聘賓皆禮辭介衆介



禮記卷之二十一  
禮既畢聘賓請問卿主國之君禮辭主國之君使卿  
歸饗餼賓朝服禮辭禮畢將償使者使者禮辭士昏  
記不親迎壻請覲主人對曰不敢固辭是亦禮辭皆  
所謂一辭而許者是一辭而許曰禮辭也又士相見  
禮某也願見無由達某子以命命某見主人對曰某  
子命某見吾子有辱請吾子之就家也某將走見賓  
對曰某不足以辱命請終賜見主人對曰某不敢為  
儀固請吾子之就家也某將走見賓對曰某不敢為  
儀固以請主人對曰某也固辭不得命將走見疏以

此為固辭則下文辭贄辭還贄皆固辭燕禮公與客  
燕曰寡君有不腆之酒以請吾子之與寡君須臾焉  
使某也以請對曰寡君君之私也君無所辱賜于使  
臣臣敢辭寡君固曰不腆使某固以請寡君君之私  
也君無所辱賜于使臣臣敢固辭寡君固曰不腆使  
某固以請某固辭不得命敢不從是亦固辭若下文  
致命則禮辭矣是再辭而許曰固辭也又士相見禮  
士見於大夫終辭其贄若嘗為臣者則禮辭其贄注  
終辭其贄以將不親答也禮辭一辭其贄而許也是  
三辭不許曰終辭也至於鄉飲酒鄉射燕禮大射儀



之辭降辭洗雖較禮辭為殺亦禮辭之屬也聘禮士  
 介覲以臣禮見擯者辭禮請受賓固辭注賓為之辭  
 士介賤不敢以言通於主君固衍字當如面大夫也  
 敖氏繼公曰一辭而得遂亦可謂之固又聘禮記私  
 獻賓固辭注亦以為衍字考經所云固辭者蓋賓再  
 辭而後公許故曰固也禮請受者一請賓固辭者再  
 辭注未確敖說亦曲為之解也  
 又案士冠禮疏三辭而許則曰三辭不許乃  
 曰終辭引公食大夫戒賓上介出請入告三辭又引  
 司儀三辭以釋三辭而許之義而注所謂三辭不許

曰終辭者賈氏但覆述而已未嘗據經文以釋之也  
 考終辭二字上相見禮經與注皆有明文實可為三  
 辭不許曰終辭之顯證賈氏不此之引而旁及注外  
 之義何也

凡庭洗設于阼階東南南北以堂深天子諸侯當東雷  
 卿大夫士當東榮水在洗東

庭堪案士冠禮設洗注洗承盥洗者棄水器也直于東榮注榮屋翼也

南北以堂深水在洗東鄉飲酒鄉射設洗于阼階東  
 南南北以堂深東西當東榮水在洗東特牲饋食禮  
 設洗于阼階東南記設洗南北以堂深東西當東榮



水在洗東少牢饋食禮設洗于阼階東南當東榮士  
 冠禮醮用酒注洗庭洗當東榮南北以堂深此皆當  
 東榮之洗言庭洗者別于北堂上內賓之洗士昏禮  
 設洗于阼階東南經注不言當東榮及南北之節者  
 文不具也其實亦當東榮之洗所謂卿大夫士之禮  
 也燕禮設洗篚敖氏繼公云篚衍文于阼階東南當東霤壘水  
 在東注當東霤者人君為殿屋也亦南北以堂深大  
 射儀設洗于阼階東南壘水在東公食大夫禮設洗  
 如饗注必如饗者先饗後食如其近者也饗禮亡燕  
 禮則設洗於阼階東南鄭氏以燕禮證之是公食大

夫之洗當亦在阼階東南也此皆當東霤之洗所謂  
 天子諸侯之禮也

又案卿大夫士兩下屋故云當東榮人君殿屋四向  
 流水故云當東霤其實設洗皆在阼階東南異其文  
 不異其處也鄉飲酒疏堂深謂從堂廉北至房屋之  
 壁堂下洗北去堂遠近深淺取於堂上深淺假令堂  
 深三丈洗亦去堂三丈以此為度庭洗為行禮之節  
 故經注言之特詳焉

凡內洗設于北堂上南北直室東隅東西直房戶與隅  
 間



禮記卷二  
廷堪案士昏禮饗婦舅洗于南洗姑洗于北洗注南  
洗在庭北洗在北堂設兩洗者獻酬酢以潔清為敬  
士昏記婦洗在北堂直室東隅注洗在北堂所謂北  
洗北堂房中半以北洗南北直室東隅東西直房戶  
與隅間士冠禮醴冠者贊者洗于房中士虞禮亞獻  
主婦洗足爵于房中特牲饋食禮陰厭主婦盥于房  
中少牢饋食禮亞獻主婦洗于房中注皆引昏禮曰  
婦洗在北堂直室東隅婦洗士冠禮注作房中之洗  
士虞禮注作內洗文亦小異  
蓋經例在此也特牲饋食主婦洗爵于房酌亞獻尸  
及主人洗獻內兄弟于房中有司徹主人洗獻內賓

于房中注與疏皆不言何洗當亦是內洗又士昏禮  
婦至媵御沃盥交注媵沃壻盥于南洗御沃婦盥于  
北洗此在夫入于室之後則注所云南洗北洗非指  
庭洗內洗明矣豈昏禮室中復有二洗歟  
又案士虞禮庭洗則設于西階西南水在洗西篚在  
東注以為反吉而內洗則引昏禮以證之然則內洗  
禮殺故不反吉賈疏但云經不言設洗處宜與昏禮  
同未能申鄭義也庭洗壘水在東篚在西內洗士昏  
記云篚在東蓋變于庭洗篚在東則壘水在西可知  
又士昏禮注謂設兩洗以潔清為敬之故疏又謂婦



人有事不下堂聖人制禮蓋以明夫婦有別注與疏文雖異而義則同也

凡設尊賓主人敵者于房戶之間君臣則於東楹之西並兩壺有元酒有禁

廷堪案士冠禮若不醴則醮用酒尊于房戶之間兩

甒有元酒有禁注禁承尊元酒在西注元酒新水也

故兩甒之不忘注器也加勺南枋注房戶間者房西室戶東也鄉飲

酒禮尊兩壺于房戶間斯禁有元酒在西注斯禁禁

者元酒在西上也特牲饋食禮尊于戶東元酒在西注戶東

室戶東少牢饋食禮司宮尊兩甒于房戶之間注房

戶之間房西室戶東也飲酒與祭皆尊于房戶之間

者既祭獻賓及酢酬旅酬無算爵皆具賓主如飲酒

之禮也鄉射禮尊於賓席之東兩壺斯禁左元酒注

尊者北面西皆加勺鄉射不云房戶之間者蓋鄉射

于序序有堂無室無室則無房戶故但云尊於賓席

之東鄉射上經云乃席賓南面東上注不言于戶牖

之間者此射于序是也鄉飲酒疏云設酒之尊皆於

顯處見其文是以此及醮子與鄉射特牲少牢有司

徹皆在房戶之間敖氏繼公曰不言戶牖間者可知

也記云出自東房有東房西房則中有室而席賓于



戶牖之間也明矣皆與注異有司徹既祭儻尸之禮因少牢正祭之酒但攝之而已不更設尊故疏亦以為在房戶之間也燕禮司宮尊于東楹之西兩方壺左元酒南上公尊瓦大兩有豐注于東楹之西予君專此酒也玉藻曰唯君面尊元酒在南順君之面也兩瓦大在方壺之南亦南上大射儀司宮尊于東楹之西兩方壺膳尊兩甌在南有豐膳尊即燕禮公尊君之尊也兩方壺臣之尊也君臣不同尊尊君也皆有元酒故君臣皆兩尊注云酒在北尊統于君南為上也唯君面尊言專惠也燕禮大射皆臣與君行禮故尊于東楹

之西也曲禮侍飲於長者孔穎達正義曰陳尊之所貴賤不同若諸侯燕禮大射設尊在東楹之西自北嚮南陳之酌者在尊東西嚮以酌者之左為上尊尊面有鼻鼻向君示君尊有此惠也若鄉飲酒及卿大夫燕此禮不見禮經蓋孔氏推言之則設尊陳于房戶之間東西列尊尊面嚮南酌者嚮北以西為上尊時主人在阼西嚮賓在戶西牖前南嚮使賓主得夾尊示不敢專惠也尊于房戶之間但云鄉飲酒不云鄉射較賈氏為精矣燕禮尊士旅食于門西兩圓壺士賤故也

又案燕禮疏云少儀云尊壺者面其鼻鄭注云鼻在



面中言嚮人也據燕禮向君而言少儀又云尊者以酌之左者爲上尊鄉飲酒云尊兩壺于房戶之間元酒在西又鄉射云尊於賓席之東兩壺斯禁左元酒鄭注云設尊者北面西曰左此皆據酌者北面而言若據設尊之人及尊面而言卽南面以右爲尊詳疏意以爲鄉飲鄉射設元酒之位與燕禮若有異者考鄉飲鄉射尊面向南則以西爲上燕禮大射尊面向東則以南爲上經例固不異也

又案燕禮疏云若據酌者不得背君而西面當尊西東面則酌者之右爲上尊是以下文媞爵于公者交

于東楹北也考燕禮主人酬賓訖二人媞爵于公升自西階序進酌散交于楹北降阼階下皆奠觶再拜稽首注楹北西楹之北也交而相待於西階上既酌右還而返往來以右爲上注云西楹北而前疏云東楹北據此節疏云二大夫盥手洗爵訖先者升西階由西楹之北向東楹之西東面酌酒訖右還由西楹北向西階上北面後者升西階亦由西楹之北向東楹之西酌酒訖亦由西楹之北向西階上北面相待乃次第而降蓋媞爵者二人升降皆由西階故注云交于西楹北而酌酒則在東楹之西往來皆折旋故



前疏云交于東楹北不然則前疏東字或是西字之誤也

燕禮後節升實之序進注云序進往來由尊北交于東楹之北

又案大射儀注豐以承尊也則豐當為禁之屬公食

大夫禮飲酒實于觶加于豐

公食大夫不獻酬故無尊

注豐所以

承觶者也則豐又當為筐之屬

此所承者有酒之觶與筐小異

大射

儀疏云此豐若在宗廟或兩君燕亦謂之坫致爵在

於上故論語云邦君為兩君之好有反坫鄭注云反

坫反爵之坫是也賈氏以豐為反爵之器說與公食

大夫注同考鄉射大射飲不勝者皆有豐是公尊所

設一豐射而飲不勝者又一豐也燕禮大射是君燕

其臣故豐但以承尊而仍反爵于筐若兩君燕當反爵于豐歟

凡醴尊皆設于房中側尊無元酒

廷堪案士冠禮賓禮冠者側尊一甌醴注側猶特也

無偶曰側置酒曰尊側者無元酒

若醴用酒則尊于房戶之間

昏禮主人禮使者舅姑醴婦經皆云側尊甌醴于房

中注側尊於房中亦有篚有籩豆如冠禮之設是醴

尊皆在房中也禮事質而禮盛故特尊無元酒也亦

有不尊于房中者聘禮記醴尊于東廂五大一有豐

注五大五尊是聘禮主君禮賓醴尊則在東廂也

醴尊



在東廂則籩豆之屬亦在東廂可知亦有不側尊者士虞禮尊于室中北墉下當戶兩甌醴酒此是反吉以醴代元酒故醴酒竝設不側尊不于房中非醴尊正例也儀禮集說云醴尊設于房臣禮也國君則于東箱敖氏蓋據聘禮記而言理或然歟

凡堂上之篚在尊南東肆  
 廷堪案堂上之篚所以實獻酬爵觶也鄉飲酒禮設篚于禁南東肆注肆陳也鄉射禮尊于賓席之東篚在其南東肆鄉飲酒主人獻賓坐取爵于篚降洗此堂上之篚也適洗南面坐奠爵于篚下此堂下之篚

也賓酢主人亦用此爵主人受酢畢奠于東序端主人酬賓坐取觶于篚亦堂上之篚也此觶賓奠于薦東不舉主人獻介仍用前東序端之奠爵獻介畢介降洗升授主人爵于兩楹之間主人實爵自酢畢奠此爵于西楹南及獻衆賓仍用此西楹南之奠爵獻衆賓畢主人始以此爵降奠于篚此則堂下之篚也鄉射主人獻賓畢奠爵于序端酬賓後即取序端之爵獻衆賓無介故也餘皆與鄉飲酒同鄉射主人獻賓坐取爵于上篚以降疏云凡取爵于篚以降者皆是上篚鄉飲酒不言上者文略也燕禮大射堂上不



設篚雖膳篚亦在堂下也

又案鄉飲酒記獻工與笙取爵于上篚既獻奠于下  
篚注明其異器敬也如是則獻大夫亦然上篚三爵  
楊氏復曰上篚爵三解一獻賓獻遵即大獻工皆異  
爵三也主人取解酬賓一也下篚解四一人舉解為  
旅酬始一也司正舉解二也二人舉解為無算爵始  
四也敖氏繼公曰上篚爵三解一下篚解三說與楊  
氏異蓋謂一人所舉之解旅酬畢則仍奠于下篚至  
二人舉解時再取之故云下篚解三也敖氏又云既  
獻工則奠于上篚既獻笙乃奠于下篚

凡堂下之篚設于洗西南肆

廷堪案鄉飲酒禮篚在洗西南肆鄉射禮同此皆堂  
上設篚而于堂下又設篚者也士冠禮醮用酒洗有  
篚在西南順注篚亦以盛勺解陳于洗西南順北為  
上也燕禮篚在洗西南肆設膳篚在其北西面注肆  
陳也膳篚者君象觚所饌也亦南陳言西面尊之異  
其文大射儀篚在洗西南陳設膳篚在其北西面注  
或言南陳或言西面異其文也疏云洗篚言南陳亦  
西面膳篚言西面亦  
南特牲饋食記篚在洗西南順實二爵二觚四解一  
角一散少牢饋食禮設篚于洗西南肆此皆堂上不



禮記卷二  
設篚而但于堂下設篚者也燕禮大射二篚皆在堂下盛氏世佐曰二篚一盛諸臣飲器一盛君飲器而無堂上篚者蓋堂上之篚所以盛爵燕禮輕不用爵也考楊信齋謂鄉飲上篚爵三觶一是上篚亦盛觶也特牲記下篚實爵二是下篚亦盛爵也盛氏之說恐非蓋鄉飲酒鄉射賓主皆尊禮盛故堂上堂下並設篚燕禮大射君燕其臣禮殺特牲少牢祭畢而飲禮更殺故僅設堂下之篚歟  
凡陳鼎大夫士門外北面上諸侯門外南面西上反吉則西面

廷堪案士冠禮疏凡陳鼎在外者賓客之禮在內者私家之禮也士昏禮疏凡鼎陳于外者北面為正阼階下西面為正考士冠禮若殺則舉鼎陳于門外直東塾北面士昏禮期初昏陳三鼎于寢門外東方北面上特牲饋食禮陳鼎于門外北面上少牢饋食禮陳鼎于廟門之外北面上此皆私家之禮而陳鼎在外者也士冠禮注父在有鼎不陳門外謂在非注公食大夫禮甸人陳鼎七當門南面西上此陳于門外而南面者也以經文證疏多不合疑疏說誤也至于士喪禮小斂奠大斂奠朔月奠既夕禮陳鼎



皆門外西面士虞禮陳三鼎于門外之右北面北上入設于西階前東面北上則又禮之變不可引以為據也敖氏繼公曰大夫士陳鼎于門外皆北面惟喪奠西面國君陳鼎南面天子未聞此說得之凡設席南鄉北鄉于神則西上于人則東上東鄉西鄉于神則南上于人則北上廷堪案士昏禮納采及親迎皆云主人筵于戶西西上右几注主人女父也筵為神布席也戶西者尊處席西上右設几神不統于人席有首尾首為上尾為下疏云為神則西上為人則東上聘禮行聘之時几筵既設

注有几筵者以其廟受宜依神也賓至廟門司宮乃于依前設之神尊不豫事也席西上此皆為神布席于堂上南嚮以西為上者也敖氏繼公曰右几席南上右几變于生人也神位于特牲饋食禮祝筵几于室則居主位于堂則居客位此據少牢饋食言之室中東面敖氏繼公曰几亦右之之東面以南為右少牢饋食禮司宮筵于奧祝設几于筵上右之注布陳神坐也室中西南隅謂之奧席東面近南為右嚮以西為右几在西故西上也席東嚮以南為右几在南故南上也聘禮聘賓將行告禰有司筵几于室中使還奠告乃至于禰筵几于室經不云何嚮既在室中當亦東面如特牲少牢之禮



也此皆為神布席于室中東嚮以南為上者也士昏  
 禮主人徹几改筵東上注徹几改筵者鄉為神今為  
 人聘禮禮賓宰夫徹几改筵注將禮賓徹神几改神  
 席更布也賓席東上鄉射禮乃席賓南面東上眾賓  
 之席繼而西眾賓卑于賓賓東上故眾賓繼而西也燕禮司宮筵賓于  
 戶西東上又為卿設席云司宮兼卷重席設于賓左  
 東上大射儀司宮設賓席于戶西南面有加席卿席  
 賓東東上小卿賓西東上大夫繼而東上此皆為人  
 布席南嚮以東為上者也大射儀諸公阼階西北面  
 東上此為人布席北嚮以東為上者也鄉飲酒記若

有諸公則大夫于主人之北西面遵尊于主人故席主人之北西面以北為上也此為人布席西嚮以北為上者也大射儀若有  
 東面者則北上謂大夫之席此為人布席東嚮以北為上  
 者也經例甚明至于公食大夫宰夫設筵加几席鄉  
 飲酒若有尊者席于賓東鄉射尊者席于尊東有司  
 徹尸席筵于戶西南面此祭畢饋尸當以人禮事之亦皆南面以  
 東為上燕禮大射小臣設公席于阼階上西嚮有司  
 徹侑席筵于西序東面亦皆以北為上經不言者文  
 不具也李氏如圭曰有司徹尸侑席與鄉飲酒賓介  
 之席位同則其為東上北上可知矣



又案鄉飲酒鄉射之有遵猶之燕禮大射之有卿也  
卿席在賓東故遵席亦在賓東鄉席南面東上則遵  
席亦南面東上可知經與注皆無西上之文而疏以  
為遵席西上者亦因曲禮而致誤考曲禮席南鄉北  
鄉以西方為上席東鄉西鄉以南方為上蓋禮家見  
士昏禮有筵于戶西西上之文遂為此說不知經所  
謂西上指神席也禮經之例席于人南鄉北鄉以東  
方為上東鄉西鄉以北方為上說見前與曲禮正相反  
曲禮出諸儒所記信傳固不如信經也鄉射禮注大  
夫升席由東方疏意以為注既云升由下降由上則

大夫升由東方為下西方必為上故謂遵席為西上  
也夫注因曲禮之文附會以就之疏又因注而自為  
說以實之以致禮之通例游移無定而學者莫知適  
從矣

禮經釋例卷二



鐘以實之以煇獻之獻國諸林無衣而學香其味獻  
 出夫出因曲獻之文始會以味之類及因出而自食  
 大夫代出東大為不西式必為土始歸獻謝為西王

禮經釋例卷三目錄

飲食之例上

- 凡主人進賓之酒謂之獻
- 凡賓報主人之酒謂之酢
- 凡主人先飲以勸賓之酒謂之酬
- 凡正獻既畢之酒謂之旅酬
- 凡旅酬既畢之酒謂之無算爵
- 凡獻酒皆有薦禮盛者則設俎
- 凡薦脯醢在升席先設俎
- 凡獻酒禮盛者受爵于席前拜與卒爵于階上



凡獻酒禮盛者則啐酒告旨

與卒爵于堂上

凡啐酒于席末告旨則降席拜

凡獻酒禮盛者受爵告旨卒爵皆拜醉主人禮殺者不拜告旨又殺者不醉主人

凡醉如獻禮崇酒不告旨禮殺者則以虛爵授之

凡賓告旨在卒爵前于席西拜主人崇酒在卒爵後于階上拜

凡禮盛者坐卒爵禮殺者立卒爵

凡酬酒先自飲復酌奠而不綬舉觶賸爵亦如之

凡酬酒奠而不舉禮殺者則用爲旅酬無算爵始

凡酬酒不拜洗

凡獻工與笙于階上獻獲者與釋獲者于堂下獻祝與佐食于室中

其十八例

禮經釋例卷三目錄

禮經釋例

卷三目錄

二



禮經釋例卷三  
飲食之例上

禮經釋例卷三

欽凌廷堪次仲學

飲食之例上

凡主人進賓之酒謂之獻

廷堪案此燕飲之始也鄉飲酒禮主人坐取爵實之

賓之席前西北面獻賓注獻進也進酒于賓獻之儀節詳見

下鄉射禮主人坐取爵實之賓席之鄉飲酒作之席前西北

面獻賓注進于賓也凡進物曰獻燕禮大射儀主人

酌膳筵前獻賓士虞特牲饋食少牢饋食有司徹主

人初獻尸主婦亞獻尸賓長三獻尸有司徹事尸以賓客之禮非正



祭時之此皆獻禮之最尊者也鄉飲酒主人實爵介

獻尸之席前西南面獻介鄉射尊者入主人實爵席前獻

大夫大夫即燕禮大射儀主人盥洗象觶升實之射大

作酌膳酌東北面獻于公又主人洗升實散獻卿于西階

上若有諸公則先卿獻之有司徹主人主婦三獻即

長酌獻侑此獻之次焉者也鄉飲酒鄉射主人升實

爵于西階鄉射無上獻眾賓燕禮大射儀主人獻大

夫獻士于西階上獻庶子于阼階上又其次焉者也

鄉飲酒升歌三終主人獻工笙奏三終主人獻之于

西階上鄉射合樂後獻工獻笙燕禮升歌畢主人洗

升獻工笙奏畢主人洗升獻笙于西階上大射儀升

歌鹿鳴三終主人獻工鄉射次射飲不勝後司馬獻

獲者司射獻釋獲者大射儀次射飲不勝後司馬正

獻服不即獲者司射獻釋獲者士虞特牲少牢獻祝及

佐食少牢賓三獻特牲祭畢獻賓獻長兄弟眾賓眾

兄弟內兄弟及有司徹獻內賓于房中獻私人于阼

階上皆執事之人則其殺焉者也蓋行禮時執事之

大者主人皆獻之其餘至旅酬無算爵乃得與也又

鄉飲酒記鄉射記皆云獻用爵而燕禮大射獻用觶

大射獻服不用散禮殺故也



又案主人獻賓正禮也鄉飲酒之獻介獻衆賓及尊者入公如賓大夫如介鄉射之獻衆賓獻遵燕禮大射之獻公卿獻大夫獻士及庶子皆次於賓者也又燕禮大射之主人獻公者尊公不使與賓同也士虞特牲少牢之三獻此室中事尸之禮不與賓客同唯有司徹之尸侑乃饋尸于堂之禮始以賓客事之尸如賓侑如介也合樂畢獻工及笙猶之射禮之獻獲者及釋獲者祭禮之獻祝及佐食也非賓主人正禮矣祭禮之獻賓及衆賓獻長兄弟及衆兄弟獻內賓及私人亦此類也細按之皆有條而不紊聖人之心

精密如此學者審諸

大畢數也大夫對主人曾于而

凡賓報主人之酒謂之酢

人賓饋酒于西階上

廷堪案鄉飲酒鄉射禮主人獻賓畢賓實爵主人之席前東南面酢主人注酢報燕禮大射主人獻賓畢賓升酌膳以酢主人于西階上此賓酢主人也士虞禮主人獻尸畢祝酌授尸尸以醋主人主婦亞獻賓長三獻同特牲饋食禮祝酌授尸尸以醋主人注醋報也酌不洗尸不親酌尊尸也古文醋作酢又主婦獻尸畢酢如主人儀又賓三獻尸卒爵酢注酢于賓也少牢饋食禮主人獻畢祝酌授尸尸醋主人又主



婦獻尸畢祝易爵洗酌授尸主婦拜受爵尸答拜又  
 賓長獻尸畢祝酌授尸賓拜受爵尸拜送爵此正祭  
 時尸酢主人主婦賓長也有司徹主人獻尸侑畢尸  
 降盥升坐取爵酌注酌者將酢主人又主婦獻尸侑  
 致爵主人畢尸降筵受主婦爵以降注將酢主婦又  
 賓三獻畢在酌致主人後尸降筵受三獻爵酌以酢之不償尸之  
禮同此儀尸時尸酢主人主婦賓長也此酢禮之盛者  
 也鄉飲酒禮主人獻介畢介揖讓升授主人爵于兩  
 楹之間介西階上立主人實爵酢于西階上自酢也獻眾賓  
不鄉射禮主人獻大夫畢大夫遵也大夫授主人爵于兩

楹間復位主人實爵以酢于西階上此即鄉飲酒介  
 燕禮主人獻公畢洗升酌膳酒以降酢于阼階下是亦  
自大射作酌散餘儀同燕禮酌膳此酌散者主于射  
 不主飲酒故也此介遵及公酢主人也特牲禮主人  
 獻賓畢受爵酌酢注主人酌自酢者賓不敢敵主人  
 主人達其意有司徹獻長賓眾賓畢乃升長賓主人  
 酌酢于長賓注主人酌自酢序賓意賓卑不敢酢此  
 祭畢飲酒賓酢主人也皆酢禮之殺者也下此則不  
 敢酢矣又特牲禮主婦致爵于主人畢受爵酌醋又  
 主人致爵于主婦畢主人更爵酌醋又賓致爵于主



人主婦畢更爵酢于主人又主人酌養畢土養洗爵  
 升酌酢主人少牢禮主人受土養爵酌以醋于戶內  
 以及不償尸之致醋則行於賓三獻與養時亦禮之  
 殺者于其賓主人酌自酒亦實意實卑不並  
 凡主人先飲以勸賓之酒謂之酬實畢六長其賓主人  
 廷堪案酬禮行於賓酢主人後用觶不用爵唯賓主  
 人乃行之鄉飲酒禮賓酢主人後主人實觶酬賓注  
 酬勸酒也酬之言周忠信為周疏云酬酒先飲乃酬  
 賓鄉射禮賓酢主人後主人實觶酬之此主人酬賓  
 之正禮也燕禮大射主人自酢于公後升媵觶于賓

此媵觶亦酬也宰夫為主人降於正主故不曰酬而  
 曰媵觶又二人媵爵觶皆觶也散文則通于公公坐取大夫  
 所媵觶興以酬賓媵觶是主人酬賓此是公酬賓宰  
 夫代公為主人故公亦酬賓也此觶賓即用以旅酬  
 又主人獻卿後再請二人媵爵公又行一爵若賓若  
 長唯公所酬大射作賜此酬是卿舉旅之酒若為大夫士  
 舉旅則曰賜不曰酬大射為卿舉旅亦作賜此皆酬禮之殺者  
 也特牲饋食禮獻眾賓後主人洗觶酌于西方之尊  
 西階前北面酬賓此觶即後賓旅酬之觶有司徹主  
 人自酢于長賓後宰夫洗觶以升主人受酌降酬長



賓于西階南此觶卽後無算爵之觶此祭畢飲酒之  
酬亦禮之殺焉者也又有司徹賓三獻尸後主人實  
爵酬尸張氏爾岐曰特牲及下不償尸皆無酬尸之  
事此特有之奠而不舉則正祭後以賓客事尸之禮  
故獻酢之後主人酬之如賓也

又案獻酒逮及賤者如工笙獲者釋獲者祝佐食之  
類酢主人唯賓介及尊者有之酬酒雖介尊亦無之  
尊賓之意也祭禮尸酢主人而下及主婦長賓若酬  
尸亦唯主人而已蓋酬禮唯賓主人得行之償尸則  
酬尸如賓獻助祭之賓則又酬之上大夫償尸之禮

威儀多也

凡正獻既畢之酒謂之旅酬

廷堪案鄉飲酒禮合樂後主人曰請安于賓司正告

于賓賓禮辭許注為賓欲去留之

此正獻禮成賓欲去主人命司正留

之將以又云賓北面坐取俎西之觶阼階上北面酬

主人注初起旅酬也凡旅酬者少長以齒終於沃盥  
者皆弟長而無遺矣疏云不及獻酒則旅酬亦不與

旅酬所以酬正獻也又云鄭君連引無算爵與旅酬

而言終于沃洗其實此時未及沃洗也

按俎西之觶卽前一人所

舉之觶其儀節詳見後例

鄉射禮射畢賓北面坐取俎西之觶與



無與字阼階上北面酬主人此鄉飲鄉射之旅酬也

燕禮大射主人獻賓獻公酢酬禮成公取大夫所勝

解酬賓後賓以旅酬大射作于西階上則為賓舉旅

行酬禮之初成也又主人獻卿或獻畢二大夫再勝

解公又行一爵以旅于西階上如初則為卿舉旅行

酬禮之再成也又主人獻大夫畢升歌後大射在公

又舉奠解以旅于西階上如初則為大夫舉旅行酬

禮之三成也又徹俎安賓後主人始獻士獻畢賓勝

解于公前三次舉旅行酬皆二大夫勝解公坐取賓

所勝解大射與唯公所賜受者如初受酬之禮則為

士舉旅行酬禮之終也此燕禮大射之旅酬也燕禮

大射旅酬凡四次與鄉飲鄉射不同皆行于正獻之

後者也特牲饋食禮賓與兄弟辯獻後賓坐取解此

主人酬阼階前北面酬長兄弟疏云此論旅酬之事

有司徹三獻禮成二人舉解于尸侑後尸遂執解以

與北面于阼階上酬主人注三獻而禮小成使二人

舉爵序殷勤于尸侑疏云此論旅酬之事此祭畢飲

酒之旅酬亦行於正獻之後者也疏又謂旅酬後仍

有舉奠加爵等終備乃是禮之大成故云小成也考

有司徹無嗣舉奠之文特牲有之亦在加爵之後旅



酬之前疏說蓋誤又案禮記燕義獻君君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子即據禮經之儀節而言也考燕禮大射主人獻賓後亦獻公燕義云為君即為賓故上文亦云君舉旅於賓也

凡旅酬既畢之酒謂之無算爵

廷堪案鄉飲酒禮旅酬畢使二人舉觶徹俎說屢揖讓如初升坐乃羞無算爵注算數也賓主燕飲爵行無數醉而止也

儀節詳見下例

鄉射禮旅酬畢使二人舉觶

徹俎主人以賓揖讓說屢乃升大夫及眾賓皆說屢升坐乃羞無算爵燕禮主人獻庶子後無算爵注算數也爵行無次無數唯意所勸醉而止疏云此對四舉旅以前皆有次有數此則無次無數也大射儀同此燕飲正禮之無算爵也特牲饋食禮旅酬畢賓弟子及兄弟弟子舉觶後爵皆無算注賓取觶酬兄弟之黨長兄弟取觶酬賓之黨唯已所欲亦交錯以辯無次第之數因今接會使之交恩定好優勸之有司徹旅酬畢兄弟後生舉觶至賓一人舉爵于尸後賓及兄弟交錯其酬皆遂及私人爵無算又不賓尸之



禮次賓加爵後賓兄弟交錯其酬無算爵注此亦與  
 賓同者在此篇此祭畢飲酒之無算爵也皆行於旅  
 酬之後者鄉飲酒記主人之贊者西面北上不與無  
 算爵然後與謂贊者不及獻酒故不與旅酬至無算  
 爵時乃得與也禮記鄉飲酒義降說屢升坐脩爵無  
 數飲酒之節朝不廢朝莫不廢夕賓出主人拜送節  
 文終遂焉鄭注終遂猶克備也孔氏正義云降說屢  
 升坐者此謂無算爵之初也以前皆立而行禮又云  
 脩爵無數者謂無算爵也熊氏云謂爵行無數矣然  
 則飲酒之禮至無算爵乃備可知矣

又案士冠禮乃醴賓以壹獻之禮注壹獻者主人獻  
 賓而已卽燕無亞獻者獻酢酬賓主人各兩爵而禮  
 成特牲少牢饋食之禮獻尸此其類也士禮一獻卿  
 大夫三獻考一獻之禮主人獻賓賓酢主人主人將  
 酬賓先自飲訖乃酬賓奠而不舉鄉飲鄉射皆然非  
 獨特牲少牢獻賓也特牲酬賓之解卽用爲旅酬發  
 端有司徹酬賓之解卽用爲無  
算爵發端與鄉  
 飲鄉射不同注云卽燕者謂一獻之後卽行旅酬  
 也疏謂鄉飲酒未有燕非也士昏禮舅姑共饗婦以  
 一獻之禮奠酬注凡酬酒皆奠于薦左不舉其燕則  
 更使人舉爵疏云案燕禮獻酬訖別有人舉旅行酬



張氏爾岐曰其燕更使人舉爵行酬之事非此經所有賈氏蓋誤以燕禮之舉旅行酬為燕不知鄉飲酒之旅酬無算爵亦燕也此經是饗禮或饗後亦燕歟又士冠禮注云特牲少牢饋食之禮獻尸此其類也尸當作賓獻尸皆主人初獻主婦亞獻賓三獻非一獻有司徹饋尸之禮如鄉飲酒特牲則無之也惟祭畢獻賓乃一獻耳燕禮大射主人獻賓亦一獻禮成獻卿獻大夫皆不酢禮漸殺也鄉飲鄉射大夫與士行禮燕禮大射君與臣行禮膳宰為主人故皆用士禮一獻也又注云卿大夫三獻者其禮今已不傳特牲士禮于尸乃三獻者祭則攝盛故也詩小雅

瓠葉酌言獻之箋云飲酒之禮既奏酒于賓乃薦羞禮不下庶人庶人依士禮立賓主為酌名又酌言酢之箋云賓既卒爵洗而酌主人也又酌言醕之傳醕道飲也箋云主人既卒酢爵又酌自飲卒爵復酌進賓猶今俗之勸酒據箋意庶人之禮亦一獻也鄉飲鄉射燕禮大射皆行士禮故牲用狗此詩云有兔斯首然則庶人之禮其牲用兔歟注蓋疑冠禮禮賓用禮故下文引內則證之然有獻酢酬則當用酒也士冠禮歸賓俎注一獻之禮有薦有俎其牲未聞薦脯醢也俎牲體也又醕用酒三醕有乾肉折俎亦不云何牲唯既夕禮注士腊用兔耳



又案左傳昭元年夏四月趙孟叔孫豹曹大夫入于鄭鄭伯兼享之子皮戒趙孟禮終趙孟賦瓠葉子皮遂戒穆叔且告之穆叔曰趙孟欲一獻子其從之禮器一獻質三獻文又曰孔子曰誦詩三百不足以一獻有司徹三獻鄉飲酒一獻此士與大夫之別也士昏記若不親迎婿見主人主婦畢主人請醴及揖讓入醴以一獻之禮主婦薦奠酬無幣注及與也無幣異於賓客張氏爾岐曰醴疑當作禮若用醴則無酢酬竊謂經云奠酬當與舅姑饗婦同也

凡獻酒皆有薦禮盛者則設俎

廷堪案鄉飲酒鄉射主人獻賓薦脯醢主人獻眾賓眾賓之長升拜受者三人每一人獻則薦諸其席眾賓辯有脯醢注亦每薦於其位在下鄉射注少略主人獻工薦脯醢主人獻笙辯有脯醢注若諸公如賓禮大夫如介禮鄉射司馬獻獲者獻介薦脯醢賓禮大夫如介禮鄉射司馬獻獲者司射獻釋獲者皆薦脯醢燕禮主人獻賓膳宰大射作宰薦脯醢主人獻卿薦脯醢主人獻大夫胥薦脯醢主人獻工薦脯醢獻笙辯有脯醢大射不獻笙主人獻士士長升拜受觶乃薦司正與射人一人司士一人執冪一人大射乃薦司正與射人于解南



北面東上司正為上疏云此不言辯獻士乃薦士祝其數又不言司士與執事文不具

史小臣師亦就其位而薦之獻庶子如獻士之禮獻

射獻釋獲者薦脯醢特牲饋食主人獻賓薦脯醢有

司徹主人獻尸主婦自東房薦豆籩主人獻侑主婦

薦豆籩主婦獻尸侑不薦者前主人獻尸已薦也主

人獻長賓宰夫薦脯醢是凡獻酒皆有薦也鄉飲酒

主人獻賓獻介俱設折俎鄉射獻燕禮主人獻賓膳

宰大射作設折俎主人獻公膳宰大射作設折俎大

射主人獻卿庶子設折俎燕禮卿特牲主人獻賓設

折俎有司徹主人獻尸賓長設羊俎主人獻侑司馬

設羊俎尸侑豕俎至主主人獻長賓司士設俎是禮

盛者則設俎也鄉射獻獲者及釋獲者大射獻服不

及釋獲者皆設折俎服不之俎亦禮主於射故亦盛

其禮也鄉飲酒賓酢主人薦脯醢設折俎有司徹主

人受尸酢主婦薦豆籩長賓設羊俎主婦受尸酢婦

贊者薦豆籩司馬設羊俎酢所以答獻故亦盛其禮

與獻同也鄉飲酒介酢主人無薦俎者前賓酢時已

具也燕禮大射賓酢主人無薦俎者宰夫為主人辟

君也特牲有司徹主人自酢于賓無薦俎者殺于尸



也特牲主人獻眾賓薦俎設于其位

獻長兄弟如賓儀眾兄弟如眾

賓儀內兄弟如眾兄弟之儀

有司徹主人獻眾賓其薦脯醢與香

設于其位主人獻兄弟其薦香設于其位主人獻內

賓獻私人亦有薦香祭畢行神惠不同於飲酒故禮

雖殺亦薦俎並有也至于士虞禮主人獻祝薦菹醢

設俎主人獻佐食無薦俎

特牲少牢佐食皆有俎則此亦當有之

特牲

主人獻祝設菹醢俎主人獻佐食無薦記云佐食俎

殼折脊脅膚一離肺一少牢主人獻祝薦兩豆佐食

設俎主人獻兩佐食俎設于兩階之間

主婦賓長獻祝皆因主人

之薦

蓋祝事神故盛其禮薦俎並有佐食事尸故殺

其禮有俎而無薦且正祭之獻亦非飲食之通例也

士冠禮醴辭曰嘉薦令芳注嘉善也善薦謂脯醢脯

籩實醢豆實凡經所謂薦者皆指脯醢也

凡薦脯醢在升席先設俎在升席後

廷堪案鄉飲酒鄉射主人獻賓薦脯醢賓升席自西

方乃設折俎賓酢主人薦脯醢主人升席自北方設

折俎鄉飲酒主人獻介薦脯醢介升席自北方設折

俎鄉射主人獻大夫乃薦脯醢大夫升席設折俎燕

禮主人獻賓膳宰

大射作宰胥

薦脯醢賓升筵膳宰

大射作庶

子設折俎大射主人獻卿

燕禮卿無俎

乃薦脯醢卿升席



庶子設折俎皆薦脯醢在升席先設俎在升席後也  
有司徹主人獻侑主婦薦豆籩侑升筵自北方司馬  
設羊俎豕俎至主婦獻時始載于羊俎主婦受尸酢婦贊者薦豆籩  
主婦升筵司馬設羊俎此祭畢飲酒亦薦脯醢在升  
席先設俎在升席後也又有司徹主人獻尸主婦薦  
豆籩賓長設羊俎尸升筵自西方次賓羞七清司馬  
羞羊肉清次賓羞羊燔薦設凡五事主人受尸酢主  
婦薦豆籩主人升筵自北方長賓設羊俎次賓羞七  
清司馬羞羊肉清次賓羞燔薦設亦五事二者皆同  
唯尸升筵在設俎後主人升筵在設俎先為小異又

燕禮大射賓未升堂之時公已升就席故主人獻公  
薦俎皆在升席後也特牲及有司徹賓皆無席但有  
位而已故主人獻賓薦俎時無升席之文也至于公  
食大夫禮設正饌畢賓始升席則食禮異于飲酒之

例矣

凡獻酒禮盛者受爵于席前拜與卒爵于階上

廷堪案鄉飲酒禮主人獻賓升賓西階上疑

從于趙盾之佗疑立主人坐取爵前降盥時所奠實之賓之

席前西北面獻賓是主人獻爵在賓席前也又云賓  
西階上拜主人少退此賓受爵之拜在西階上主人



少退於席前少退也又云賓進受爵以復位此賓自西階上進至席前受爵復西階上位也又云主人阼階上拜送爵賓少退此主人席前授爵後復阼階上位拜送爵此拜即答賓受爵拜賓少退則於階上少退也至賓升席時經云主人阼階東疑立此時賓在席上主人

在阼階上也至賓祭畢啐酒告旨後賓告旨降席拜主人於阼階上答經云賓西階上北面坐卒爵興是賓坐卒爵于西階上卒爵後復興也又云坐奠爵遂拜執爵興此因拜而奠爵既拜之後復執爵興也賓執爵將以酢主人也又云主人阼階上荅拜此荅賓西階上卒爵拜也鄉射同

又鄉飲酒主人獻介介西階上立主人實爵介之席前西南面獻介是主人獻爵在介席前也介席即在西階上又云介西階上北面拜主人少退此介受爵之拜也在西階上又云介進北面受爵復位此介進至席前受爵復西階上位也介席東面受爵則北面又云主人介右拜送爵介少退此主人授爵後即于西階上拜送也又云主人立于西階東在介右至介祭畢不啐肺不啐酒不告旨下賓自南方降席北面坐卒爵興坐奠爵遂拜執爵興此在西階上也又云主人介右荅拜亦在西階上也賓主人專階介主人共階禮殺也鄉射主人獻大夫與鄉飲酒獻介



同唯大夫席于尊東南面為異燕禮大射主人獻賓  
升酌膳公酒謂之膳筵前獻賓賓西階上拜筵前受爵反  
位主人賓右拜送爵至賓祭畢啐酒告旨告旨亦降  
西階上然後賓西階上北面坐卒爵興坐奠爵拜執  
爵興燕禮無此三主人答拜亦于賓右拜也賓主人  
同在西階上與鄉飲酒獻介鄉射獻大夫同燕禮大  
射宰夫為主人故殺于正主也亦啐肺啐酒告旨者  
賓之禮盛于介與大夫也若獻卿則亦不啐酒不告  
旨矣有司徹主人獻尸尸侑升主人坐取爵酌獻尸  
亦在尸之席前獻也又云尸北面拜受爵亦于西楹

西拜也又云主人東楹東北面拜送爵此答尸拜也  
西楹西即西階上至尸祭畢亦啐啐酒告旨尸降席  
東楹東即東階上然後尸降筵北面于西楹西坐卒爵執爵以  
興坐奠爵拜執爵以興主人北面于東楹東答拜例  
與鄉飲酒鄉射獻賓同也又主人酌獻侑亦在侑之  
席前獻也又云侑西楹西北面拜受爵亦進至席前  
受爵復西楹西之位也又云主人在其右答拜即拜  
送爵也至侑祭畢不啐肺不啐然後降筵自北方北  
面于西楹西坐卒爵執爵以興坐奠爵拜主人答拜  
注答拜拜例與鄉飲酒獻介鄉射獻大夫同也此皆  
于侑之右



禮之盛者也若鄉飲酒鄉射獻眾賓以下燕禮大射  
 獻大夫以下特牲有司徹獻長賓以下則其禮漸殺  
 不能備諸儀節矣至于燕禮大射主人獻公公拜受  
 爵主人降自西階阼階下北面拜送爵公卒爵拜主人亦于階下  
 答此臣與君行禮也有司徹主婦獻尸尸拜于筵上  
 受主婦西面于主人之席北拜送爵尸卒爵拜主婦亦于主人之北  
 西面答拜主婦獻侑侑拜受爵當亦于席上拜主婦主人之北西  
 面答拜侑卒爵拜主婦亦于主人之北西面答拜此婦人與男子行禮也  
 故皆與獻酒之正例不同也  
 凡獻酒禮盛者則啐酒告旨

廷堪案鄉飲酒鄉射主人獻賓皆啐酒告旨疏云賓  
 言旨甘主人之味燕禮大射主人獻賓亦皆啐酒告  
 旨有司徹主人獻尸亦啐酒告旨皆禮之盛者鄉飲  
 酒主人獻介鄉射主人獻大夫皆不啐酒不告旨燕  
 禮大射主人獻卿亦皆不啐酒不告旨有司徹主人  
 獻侑亦不啐酒不告旨皆禮之殺者蓋賓之告旨猶  
 主人之崇酒禮盛者皆有之至于有司徹主婦獻尸  
 尸不啐酒不告旨者則主人獻尸時已啐酒告旨矣  
 且主婦之禮殺亦所以辟主人也  
 凡啐酒于席末告旨則降席拜



禮記卷三  
廷堪案鄉飲酒鄉射主人獻賓皆席末坐啐酒燕禮  
大射主人獻賓亦皆席末坐啐酒有司徹主人獻尸  
尸亦席末坐啐酒是啐酒則於席末也鄉飲酒義曰  
啐酒成禮也於席末言是席之正非專為飲食也為  
行禮也鄭氏注云祭薦祭酒齊肺於席中唯啐酒於  
席末也鄉飲酒鄉射主人獻賓皆降席坐奠爵拜告  
旨執爵興主人阼階上答拜燕禮大射主人獻賓亦  
皆降席坐奠爵拜告旨執爵興主人答拜於賓右  
有司徹主人獻尸尸坐奠爵拜告旨執爵以興主人北  
面于東楹東答拜經不云降席者文不具也是告旨

則降席拜也蓋正獻之時賓主人各三拜受爵送爵  
一拜也告旨一拜也卒爵一拜也受爵送爵卒爵皆  
拜于階上唯賓與尸告旨之拜則降席而主人亦于  
階上答拜也

凡獻酒禮盛者受爵告旨卒爵皆拜酢主人禮殺者不  
拜告旨又殺者不酢主人  
廷堪案獻酒拜受爵拜告旨拜卒爵酢主人如鄉飲  
酒鄉射主人獻賓燕禮大射主人獻賓有司徹主人  
獻尸是也不拜告旨如鄉飲酒主人獻介鄉射主人  
獻大夫特牲饋食主人獻賓獻內賓有司徹主人獻



侑尸酢主人至再拜崇酒時侑亦升主人獻長賓是

也不酢主人如鄉飲酒鄉射主人獻眾賓燕禮大射

主人獻卿獻大夫獻士特牲主人獻眾賓有司徹主

人獻眾賓獻兄弟獻內賓是也不拜卒爵如鄉飲酒

鄉射主人獻眾賓眾賓之長獻工工之長獻笙笙之

長鄉射獻獲者釋獲者燕禮大射主人獻大夫獻士

士之長獻工工之長獻笙笙之長大射不獻笙大射司馬

正獻獲者注不言拜既爵司馬正司射獻釋獲者特

牲主人獻眾賓有司徹主人獻眾賓眾賓長獻兄弟

兄弟之長是也不拜受爵如鄉飲酒鄉射主人獻眾

賓眾賓之長升拜受者三獻眾工獻眾笙燕禮大射

主人獻眾工獻眾士燕禮獻眾笙有司徹主人獻眾

賓經云眾賓長升拜受爵注獻眾兄弟是也至于燕

禮大射獻庶子則如獻士之禮獻左右正與內小臣

則如獻庶子之禮也獻庶子左右正內小臣皆于阼

階上獻士則于西階上特牲主人獻長兄弟于阼階

上則如賓儀獻眾兄弟則如眾賓儀獻內兄弟即內

于房中則如獻眾兄弟之儀也若燕禮大射主人獻

公不告旨者以酒是已物非禮殺也有司徹主婦受

尸酢不崇酒者辟主人也又主人獻私人于阼階上



拜于下升受主人答其長拜又云主人於其羣私人不答拜是羣私人皆于階下拜受爵主人唯于其長答拜與衆賓衆工衆笙衆士衆兄弟不拜受爵之例不同也

凡酢如獻禮崇酒不告旨禮殺者則以虛爵授之

廷堪案鄉飲酒鄉射賓酢主人實爵主人之席前東南面酢主人主人阼階上拜賓少退主人進受爵復位賓西階上拜送爵薦脯醢主人升席自北方設折俎祭如賓禮不告旨自席前適阼階上北面坐卒爵與坐奠爵遂拜執爵與賓西階上答拜主人坐奠爵

于序端阼階上北面再拜崇酒賓西階上答拜有司徹主人受尸酢尸升坐取爵酌主人東楹東北面拜受爵尸西楹西北面答拜至次賓羞七清後主人席末坐啐酒亦不告旨執爵以興至次賓羞燔後主人降筵

自北方北面于阼階上坐卒爵執爵以興坐奠爵拜執爵以興尸西楹西答拜主人坐奠爵于東序南侑升尸侑皆北面于西楹西主人北面于東楹東再拜崇酒尸侑皆答再拜是酢酒唯不告旨而崇酒與獻禮異餘皆同也亦有不崇酒者燕禮大射賓酢主人升酌膳以酢主人于西階上主人北面拜受爵賓主



人之左拜送爵主人坐祭不啐酒不拜酒不告旨射大

不云不告旨遂卒爵興坐奠爵拜執爵興賓答拜主

文不具也人不崇酒此主人以宰夫為之酒是君酒故不崇酒

注云辟正君是也皆賓酌之以酢主人者鄉飲酒介

酢主人升授主人爵于兩楹之間介西階上立主人

實爵酢于西階上介右坐奠爵遂拜執爵興介答拜

主人坐祭遂飲卒爵興坐奠爵遂拜執爵興介答拜

主人坐奠爵于西楹南介右再拜崇酒介答拜鄉射

大夫酢主人升大夫授主人爵于兩楹間復位復西

位主人實爵以酢于西階上坐奠爵拜大夫答拜坐

祭卒爵拜大夫答拜主人坐奠爵于西楹南再拜崇

酒大夫答拜與鄉飲酒介酢主人同皆以虛爵授主

人不自酌蓋禮之殺者鄉飲酒注云介不自酌下賓

酒者賓主共之是也亦崇酒者酒已物也燕禮大射

主人自酢于公更爵洗疏云獻君自酢同用觚必升

酌膳酒大射作以降酢于阼階下北面坐奠爵再拜

稽首公答再拜大射作主人坐祭遂卒爵大射此下

爵四字此再拜稽首公答再拜大射作則臣與君行

文不具禮也有司徹主婦受尸酢尸酌主婦出于房西面拜

受爵尸北面于侑東答拜主婦入于房司宮設席于



房中南面主婦立于席西薦設畢

薦設凡三節婦贊者薦豆籩司馬設

羊俎次賓羞羊燔

主婦執爵以出于房西面于主人席北立

卒爵執爵拜尸西楹西北面答拜則男子與婦人行

禮也皆與酢之正例異至于特牲主人獻賓畢受爵

酌酢奠爵拜賓答拜主人坐祭卒爵拜賓答拜

獻長兄弟

如賓儀

有司徹主人酌酢于長賓西階上北面賓在左

主人坐奠爵拜執爵以興賓答拜坐祭遂飲卒爵執

爵以興坐奠爵拜賓答拜則皆祭畢飲酒禮又殺矣

又有司徹賓三獻受尸酢尸降筵受三獻爵

三獻卽賓也

酌以酢之三獻西楹西北面拜受爵尸在其右以授

之尸升筵南面答拜坐祭遂飲卒爵拜尸答拜亦尸

親酌不以虛爵授賓者尊賓故盛其禮也

又案特牲饋食禮主人初獻尸醋主人主婦亞獻尸

酢主婦賓三獻主婦致爵于主人受爵酌醋主人致

爵于主婦更爵酌醋尸卒爵酢賓賓酌致于主人主

婦更爵酢于主人少牢饋食禮主人初獻尸酢主人

主婦亞獻尸酢主婦賓長三獻尸醋賓長有司徹不

賓尸之禮主人初獻尸醋主人主婦亞獻尸醋主婦

賓長三獻主婦致爵于主人受爵自醋尸作止爵酢

賓賓致爵于主人主婦易爵自醋以及士虞禮主人



禮記卷三十一  
卷三十一  
獻尸尸醋主人則皆正祭時之獻酢而非飲酒之獻  
酢矣

凡賓告旨在卒爵前于席西拜主人崇酒在卒爵後于  
階上拜

廷堪案鄉飲酒鄉射主人獻賓皆席末坐啐酒降席  
坐奠爵拜告旨注降席席西也然後賓西階上北面  
坐卒爵燕禮大射主人獻賓亦皆席末坐啐酒降席  
坐奠爵拜告旨然後賓西階上北面坐卒爵是賓告  
旨皆在卒爵前于席西拜也有司徹主人獻尸亦席  
末坐啐酒拜告旨然後尸降筵北面于西楹西坐卒

爵饋尸之尸如飲酒之賓故其例同也鄉飲酒鄉射  
賓酢主人皆自席前適阼階上北面坐卒爵拜然後  
阼階上北面再拜崇酒鄉飲酒介酢主人坐祭遂飲  
卒爵然後介右再拜崇酒鄉射大夫酢主人坐祭卒  
爵拜然後再拜崇酒亦在大夫右拜有司徹主人受  
尸酢降筵自北方北面于阼階上坐卒爵拜然後北  
面于東楹東再拜崇酒是主人崇酒皆在卒爵後於  
階上拜也燕禮大射賓酢主人主人卒爵拜後不崇  
酒者主人本宰夫代公爲之酒非已物故其例異也  
崇酒必再拜者所以申主人之敬也



凡禮盛者坐卒爵禮殺者立卒爵

廷堪案鄉飲酒禮主人獻賓賓酢主人主人獻介介

酢主人鄉射禮主人獻賓賓酢主人主人獻遵如賓禮

遵酢主人燕禮大射主人獻賓賓酢主人主人自酢

于公主人獻卿特牲饋食禮主人獻賓主人自酢有

司徹主人獻尸獻侑主人受尸酢主婦獻尸獻侑致

爵于主人主人獻長賓主人自酢于長賓賓受尸酢

皆坐卒爵是禮盛者坐卒爵也又鄉飲酒鄉射主人

獻衆賓燕禮大射主人獻大夫獻士獻庶子如獻士之禮左右正內

小臣大射鄉射獻獲者釋獲者特牲饋食主人獻衆

賓衆兄弟內兄弟同有司徹主人辯獻衆賓獻兄弟獻內賓

獻私人皆坐祭立飲是禮殺者立卒爵也燕禮大射

主人獻公立卒爵者嫌與賓同也鄉飲酒燕禮獻笙

立卒爵獻工坐卒爵者工不能備禮也特牲少牢獻

祝與佐食皆坐卒爵者以其接神事尸尊之故盛其

禮也室中獻尸不云坐卒爵者蒙上文尸即席坐也

少牢云尸升筵遂坐士昏禮婦餽畢姑醕特牲少牢餽畢主人

醕酢皆坐卒爵者以其尊者之餘也又鄉飲酒鄉射

主人酬賓燕禮大射主人酬賓有司徹主人酬尸酬

賓皆坐祭遂飲此酬禮之盛者也鄉飲酒鄉射一人



舉觶二人舉觶皆坐祭遂飲燕禮大射二大夫媵爵皆坐祭遂卒觶特牲饋食主人酬賓坐祭卒觶此旅酬之發端禮亦盛故坐卒爵也至於旅酬無算爵其禮殺則皆立飲矣獻酢用爵自酬以下皆用觶此又隆殺之義也鄉飲酒記坐卒爵者拜既爵立卒爵者不拜既爵注隆殺各從其宜不使相錯唯工不從此禮亦卒爵之例也

凡酬酒先自飲復酌奠而不授舉觶媵爵亦如之

廷堪案鄉飲酒鄉射主人酬賓卒洗揖讓升賓西階上疑立主人實觶酬賓阼階上北面坐奠觶遂拜執

觶興賓西階上答拜坐祭遂飲卒觶興坐奠觶遂拜執觶興賓西階上答拜此主人先自飲也又云賓西階上立主人實觶賓之席前北面賓西階上拜主人少退卒拜進坐奠觶于薦西賓辭坐取觶復位主人阼階上拜送是主人復酌奠而不授也燕禮大射主人酬賓升酌散此自飲故酌散西階上坐奠爵拜賓賓降筵燕禮疏云案賓前受獻訖立于序內以來未有升筵之事鄉飲酒大射酬時皆主人西階上坐奠爵拜賓西階上北面答拜酬前賓皆無逆在席者或言降筵蓋誤疏說是也今以大射經文校之則賓降筵三字當從大射作西階上三字蓋此節北面答拜主人坐祭遂飲賓辭卒爵拜賓答拜此主人先自飲也又云



主人酌膳

此將以酬賓故酌膳

賓西階上拜受爵于筵前反位

主人拜送爵經但云賓受爵不云主人授爵奠爵當

亦如鄉飲酒鄉射奠而不授之例疏謂主人不坐奠

于薦西者非也有司徹主人酬尸東楹東北面坐奠

爵拜尸西楹西北面答拜坐祭遂飲卒爵拜尸答拜

此主人先自飲也又云主人實觶尸拜受爵主人反

位答拜不云主人奠觶者亦文不具也主人酬賓亦

然考特牲饋食禮主人酬賓自飲訖復酌亦先奠觶

于薦北則酬酒之例皆奠而不授可知也又鄉飲酒

鄉射一人舉觶于賓實觶西階上坐奠觶遂拜執觶

興賓席末答拜坐祭遂飲卒觶興坐奠觶遂拜執觶

興賓答拜降洗升實觶立于西階上賓拜進坐奠觶

于薦西賓辭坐受以興舉觶者西階上拜送賓坐奠

觶于其所

此觶為旅酬之始故奠于其所

鄉飲酒二人舉觶于賓介

洗升實觶于西階上皆坐奠觶遂拜執觶興賓介席

末答拜皆坐祭遂飲卒觶興坐奠觶遂拜執觶興賓

介席末答拜逆降洗升實觶皆立于西階上賓介皆

拜皆進薦西奠之賓辭坐取觶以興介則薦南奠之

介坐受以興退皆拜送降賓介奠于其所

此觶為無算爵之始

故皆奠于其所鄉射二人舉觶于賓與大夫同特牲饋食禮



兄弟弟子舉觶于長兄弟如主人酬賓儀賓弟子及兄弟弟子各舉觶于其長奠觶拜長皆答拜舉觶者祭卒觶拜長皆答拜舉觶者洗各酌于其尊復初位長皆拜舉觶者皆奠觶于薦右長皆執以興舉觶者皆復位答拜長皆奠觶于其所此二觶為無算爵始是舉觶之例亦先自飲復酌奠而不授也燕禮大射下大夫二人媵爵于公升自西階序進酌散交于楹北降阼階下皆奠觶再拜稽首執觶與公答再拜媵爵者皆坐祭遂卒觶興坐奠觶再拜稽首執觶與公答再拜又云若君命皆致則序進奠觶于篚阼階下皆再拜稽

首公答再拜媵爵者洗象觶升實之序進坐奠于薦南北上降阼階下皆再拜稽首送觶公答再拜為賓舉旅為卿舉旅即以獻卿後媵爵亦同為人夫舉旅此二觶發端以此觶發端獻士後賓媵觶于公注此當言媵觶之禮皆用解言觶者字之誤也古者觶字或作角旁氏由此酌散下拜公降一等小臣辭賓升再拜稽首公答再拜賓坐祭卒爵再拜稽首公答再拜賓降洗象觶升酌膳坐奠于薦南降拜小臣辭大射皆作小臣正辭賓升成拜公答再拜為土舉旅以是媵爵之例亦先自飲復酌奠而不授也至于有司徹主人酬賓自飲畢升酌但云賓拜受爵主人拜送爵不云主人奠觶又二



人舉觶于尸侑自飲畢升酌但云尸侑皆升受爵舉

觶者皆拜送

此二觶為旅酬始

不云舉觶者奠觶又兄弟之

後生者舉觶于其長自飲畢升酌但云長拜受于其

位舉爵者東面答拜

此觶與前主人酬賓之觶為無算爵始

不云後生

奠觶皆文不具也

凡酬酒奠而不舉禮殺者則用為旅酬無算爵始

廷堪案鄉飲酒鄉射主人酬賓坐奠觶于薦西主人

拜送後賓北面坐奠觶于薦東注酬酒不舉君子不

盡人之歡不竭人之忠以全交也燕禮大射主人酬

賓拜送爵後賓升席坐祭酒遂奠于薦東注奠之者

酬不舉也有司徹主人酬尸尸拜受爵主人答拜後

尸北面坐奠爵于薦左是酬酒皆奠而不舉也特牲

饋食禮主人酬賓奠觶于薦北賓坐取觶奠于薦南

賓位東面薦北即薦左也薦南即薦右也此觶至嗣

舉奠後與兄弟弟子所舉之觶同為旅酬發端有司

徹主人酬賓賓拜受爵主人拜送爵賓西面坐奠爵

于薦左此觶至旅酬後與兄弟後生所舉之觶同為

無算爵發端皆祭畢之飲酒是酬酒禮殺者即用為

旅酬無算爵始也蓋特牲旅酬之禮同于有司徹無

算爵之禮而有司徹旅酬則別使二人舉觶于尸與



禮記卷三十一 燕禮  
侑爲之始是士禮殺于大夫也漢儒推士禮而致于天子故鄭注中庸旅酬下爲上引特牲以證之而不引有司徹也

凡酬酒不拜洗

廷堪案獻酒禮盛者共四次拜拜洗在未獻之前一次也拜受爵送爵二次也拜告旨三次也拜卒爵四次也禮殺者則不拜洗也酢酒禮盛者亦四次拜拜洗在未酢之前一次也拜受爵送爵二次也拜卒爵三次也再拜崇酒四次也禮殺者則不拜洗也至于酬酒雖是賓主人正禮亦不拜洗但有三次拜主人

自實解之拜一次也主人自卒解之拜二次也卒解之後主人降洗如獻禮升不拜洗至受爵送爵之時始拜三次也酬酒奠而不舉故亦無卒解拜也鄉飲酒鄉射主人酬賓燕禮大射主人酬賓特牲饋食禮主人酬賓有司徹主人酬尸主人酬賓皆然蓋酬酒之禮又殺于獻酢矣

凡獻工與笙于階上獻獲者與釋獲者于堂下獻祝與佐食于室中

廷堪案鄉飲酒禮升歌畢主人獻工阼階上拜送爵笙奏畢主人獻之于西階上鄉射禮合樂畢主人獻



工阼階上拜送爵獻畢遂獻笙于西階上燕禮升歌  
 畢主人獻工西階上拜送爵公在阼階故獻于西階上與鄉飲鄉射不同也  
 笙奏畢主人洗升獻笙于西階上大射儀歌鹿鳴三  
 終畢主人獻工西階上拜送爵管新宮三終畢不獻是獻工與  
 笙于階上也鄉射禮二次射飲不勝者後司馬洗爵  
 升實之以降獻獲者于侯又司射洗爵升實之以降  
 獻釋獲者于其位少南大射儀第二次射飲不勝者  
 後司馬正洗散遂實爵此尊在堂下獻服不即獲者服不侯  
 西北三步北面拜受爵又司射洗觶升實之降獻釋  
 獲者于其位少南是獻獲者與釋獲者于堂下也土

虞禮尸入九飯主人初獻筵祝南面主人獻祝畢酌  
 獻佐食亞獻三獻如初特牲饋食禮尸入九飯主人初獻筵  
 祝南面主人獻祝畢酌獻佐食亞獻三獻如初少牢饋食禮  
 尸入十一飯主人獻尸致嘏畢主人獻祝設席南面  
 獻畢獻上佐食尸內牖東北面拜坐受爵下佐食亦  
 如之主婦亞獻同唯賓長不獻佐食是獻祝與佐食于室中也獲者  
 釋獲者有事于堂下故獻于堂下祝與佐食有事于  
 室中故獻于室中工有事于階上笙有事于階下而  
 皆獻于階上者統于工也獻獲者及釋獲者不用主  
 人而用司馬司射各以其職也







